

## Wes'i Lomba

Un tim di dòkter a hasi un estudio di e influensia ku hende tin riba e komportashon di hóbenan. Nan a splika dies estudiante ku un pèrsona parando dilanti lo hisa diferente karchi pa nan mira. Kada karchi lo tin tres liña di diferente largura. E pèrsona lo mustra na kada liña riba e karchi. Ora e ta mustra na e liña mas largu, hisa man.

Ma UN di e dies hóbenan no tabata sa ku e otro nuebe studiantenan a ser instruí adelantá pa NO hisa man ora ta indiká e liña mas largu; nan mester vota pa esun di DOS mas largu. Ora a hisa e promé karchi, nuebe man a bai laira pa liña A, ku klaramente tabata mas kòrtiku ku liña B. Esun ku no tabata sa di e studio, a wak rònt ku inkredulidat. Tabata opvivo ku liña B ta mas largu. Ma debi ku tur nuebe hóben a hisa man pa liña A, e tambe a hisa man. E no tabata ke pa nan hari'é. I ku e siguiente karchinan, el a sigui hisa man pa esun robes, huntu ku e otro nuebe hóben, maske e tabata sa ku e ta skohe esun robes.

Hasiendo e mésun prueba ku diferente hóben, e dòkternan a nota ku 75% di nan a hisa man huntu ku e otro nuebe estudiante. Nan no tabatin e wes'i lomba pa kontradisí nan koleganan, maske nan tabata sa ku nan ta skohe robes. Solamente 25% a riska vota diferente.

E estudio tambe a revelá, si ocho alumno a vota pa e liña robes i ún hóben a hisa man pa e liña korekto, e chèns tabata muchu mas grandi ku e hóben lo vota pa e liña korekto. Un aliado a duna mas forsa pa hasi loke e tabata sa ta korekto.

Nos tur ta deseá aseptashon di otronan. E deseo aki ta mas fuerte durante e añanan di tinejer. Pa haña e aseptashon deseá, nan ke ta nèt manera tur otro hóben—hasi loke nan ta hasi, papia manera nan ta papia, bisti manera nan ta bisti, pensa manera nan ta pensa, èts. Nan tin miedu pa ta diferente.

Ta ún kos pa vota pa un liña robes. Falta di wes'i lomba den e kaso ei no tin konsekuensia. Ma diariamente nos yunan ta skohe entre loke ta bon i malu, **desishonnan ku por tin konsekuensia bida largu!** Hopi bes, nan ta opta pa loke ta malu simplemente pasobra **tur otro hóben ta hasié!** Nan no tin e wes'i lomba pa para so pa loke nan SA ta bon, bèrdat, i korekto!

Tantu hóben ta falta e kurashi pa bisa “nò!” pa ku algu ku nan sa ta malu. Por ehèmpel, kua hóben no sa ku droga ta malu? Mayoria no ke mishi ku e porkeria. Ma tòg ora un hóben ta hañ'é ku amigunan ku ta usando droga i nan ta ofres'é, pa motibu di miedu ku nan lo harié i hasi chèrchi di dje, e no ta despuesto pa bisa “nò,” maske e sa ku droga ta malu.

Adolesentenan so ku ta falta wes'i lomba? Tantu adulto den den nos komunidad no tin e “guts” pa para nan so, inmovibel, pa loke nan sa ta bon, bèrdat, hustu, korekto... maske tur otro hende ta bai tras di loke ta robes, inhustu, eror, falsu, piká!

Bo no por spera di ta popular si bo ta tripi ta diferente. Hesus tabatin wes'i lomba pa para Su so pa e bèrdat...i a ser krusifiká! Ma kua ta mas importante: popularidat òf un konsenshi limpi, sabiendo ku bo a para pa loke ta bon? Beibel ta reta nos pa para—nos so si ta nesario—pa loke ta bon i bèrdat. “*No sea conforme e mundu aki, ma sea transformá...*” (Romanonan 12:2). Hesus asta ta laga sa ku tin konsekuensianan etèrno pa esun ku no tin e wes'i lomba pa aseptá Kristo i para p'E i bèrdat (Su Palabra). “*Ken ku tin bèrguensa di Mi i di Mi palabranan den e generashon adúltero I pekaminoso aki, e Yu di Hende tambe lo tin bèrguensa di djé ora ku E bin den e gloria di Su Tata huntu ku e angelnan santu*” (Marko 8:38).

Ta bal e la pena pa siña nos yunan loke ta bon i malu, i enkurashá nan pa para (nan so si mester) pa loke ta bèrdat i bon. Ma no pensa ku nan lo hasié si bo mes no tin e “guts” pa hasié! E mester sa ku bo ta despuesto pa para huntu kun'é si e mester para su so pa e motibu korekto. Bo yu mester mira bo ehèmpel. Pa e por para su so, e mester sa ku abo tin wes'i lomba!